

**KUMPUNAN**  
RAM LEH HNAM  
HUMHALH

**YMA AW**



## Bawlhhlawh paih man khawn


**Chanmari West, 23th Sept :** Aizawl Municipal Council-in an huamchhunga bawlhhlawh PPP Mode hmanga paih man khawn tura ruahmanna a siam angin kan veng chhungah pawh he ruahmanna hi kalpui a ni a, Local Council pawhin August thla atangin paih man khawn turin ruahmanna a siam a ni.


Kan veng chhunga chhungkaw tinah leh dawr tinah Rs 20 theuh khawn tur a ni. Bawlhhlawh paih tur hian section hrang hranga khawn turin heng mite hi Local Council chuan a ruat a ni. Chawngbawla Section-ah Lalzuithangi, Neuva Section-ah Lalbiakzova, Khuangchera Section-ah Zothanmawii, Vanapa Section-ah Biakthanmawii leh Taitesena Section-ah C. Lalrosiama te ruat an ni. Heng mi ruat chhuahte hian kum khat chhung an khawn dawn a ni. Kan veng chhunga chhungkaw tinten bawlhhlawh paih man an rawn khawn hi lo pe ngei tura ngen leh hriattir an ni.


Chanmari West Anganwadi Co-ordination Committee hmalaknain Chanmari West Anganwadi Centre-I chu sak mek zel a ni a, ICDS atanga


sum hmuh hi a beitham avangin sak zawh theih a ni dawn lo va, tha taka sak zawh hram duh a ni a, chuvang chuan kan veng chhunga chhungkaw tin ten rawra tin hnih (2) theuh thawh tura ngen an ni a, heng rawrate hi Vanapa Section YMA Buk-ah dah tur a ni a, dahte chuan Pu H. Vanlalvena hnenah hming ziah tir zel tur a ni. Rawra nei remchang lo chuan Rs 50/- thawh theih a ni a, pawisa pe duhte chuan heng mite hnenah hian pek theih a ni ang. Chawngbawla Section-ah Pu C. Lalmuanpuia, Vanapa Section-ah Pu H. Vanlalvena, Neuva Section-ah Pu Lalliansangpuia, Taitesena Section-ah Pu RL. Thanhnuna leh Khuangchera Section-ah Pu H. Lalramhluna te hnenah September thla chhungin pek tur a ni ang.


## Branch News


 Central Road tlangna atana YMA ten hna kan thawh chu thawh chhonzawm zel a ni a, rokhawlhna a awm loh chuan tunkar hian zawh hman beisei a ni.

 Inter Branch YMA Volleyball mipa teamte kan chhuah ve dawn avangin, hemi atana hman turin Section tinte tlawmngai a Rs 1000/- theuh thawh tura ngen kan nih kha, Ni 26.9.2012 ral hma hian Branch Finance Secretary hnenah theh lut tura ngen kan ni e.

 Ramhlun Sport Complex leh Ramhlun Vengthara In chhia tanpuina tur Section ten an khawn mek a, chhungtin ten mahni remchan ang lo pe turin kan inngen a, khawn zo tawh chuan Ni 26.9.2012 ral hmain Branch Finance Secretary hnenah theh lut tur a ni e.

 Chanmari West Prtesbyterian Kohhranin Camping a buatsaihah kan hruaitu leh member eng emaw zat chu kan President, Fin. Secy hovin an duty a, Pu R. Lalmalsawma pawh campers in a lut.

 Zirtawpni khan CEC meeting an thu a, Electoralrol leh Conference thlirlawk a ni a, kan President pawh a he meetingah hian a tel a ni.

 Ni 21st September. 2012 zan dar 7:30 vel khan Vaivakawm Police te chuan kan veng Sairang road thlanmual pengah Rakzu 340 Litre an man a, he ruihhlo hi Thiltlang a phurh tur niin Driver leh zu neitu ni bawKapsianmanga s/o Liana, Phunchawng leh Zu phurhnan a hman Sumo (Aizawl to Guwahati service) Mz-01 D 8966 chu an man tel nghal a ni.

## DISASTER COMMITTEE LAWMTHU LEH NGENNA

Chaltlang kham atanga lung rawn lumin kan vengchhunga In a tihchhiatte tanpuina tur pawisa thawhtute hming list rawn tarlan kha tihsual palh a awm a, tih sualte chungah ngaihdamna an dil a. Tanpuina pawisa hman Rs 34,539 tih kha tihsual a ni a, pawisa hmanna hi tihfel a la ni lo a, tihfel a nih hnuah tarlan a ni ang. Tanpuina kan dawn belh leh tihsualte hetiang hi a ni.

- |                     |         |
|---------------------|---------|
| 1. Pu H.Suana       | Rs 1000 |
| 2. Pu K.Lalchullova | Rs 500  |
| 3. Pi Sangliani     | Rs 200  |
| 4. Ramthanzuala     | Rs 500  |
| 5. Lallianringa     | Rs 500  |

- |                      |        |
|----------------------|--------|
| 6. Laldingliana      | Rs 200 |
| 7. Lalrinsangi       | Rs 500 |
| 8. K. Lianzama       | Rs 100 |
| 9. K.Lalbiakmawia    | Rs 100 |
| 10. Chhunthuama      | Rs 100 |
| 11. Laltanpuia       | Rs 100 |
| 12. Lalzawmliana     | Rs 250 |
| 13. R. Lalremsiama   | Rs 300 |
| 14. H.Tlangliana (L) | Rs 500 |
| 15. Lalthankhuma     | Rs 100 |
| 16. R.Rohnuna        | Rs 500 |
| 17. Lalchhanhimi     | Rs 50  |
| 18. Lalkrosthanga    | Buhfai |

Tihdikna Remliana 'V' a mi kha  
Lalrinliana tihtur a ni e.

## NGENNA

YMA Park leh Turning Point (Sub Centre kawt) ah motor dah phal loh a ni a, tunlai hian dah ching kan awm leh chu a pawihle a, dah luih a nih a, motor-in a lo tuar palh a nih

pawhin tuman mawh kan phur dawn lova, thil pawihle a thlen hma a motor lo dah thinte chuan dah tawh lo turin Chanmari West Branch YMA chuan kan ngen a ni.



## TUNKAR CHANGVAWN

“Mi fing chuan a kalna a hria a, mi a chuan a hre lova, mahse khawrel thuhmun an zaa chungah a thleng tho tih ka hmu”.

Thuhritu 2:14

**Editorial Board**

<b>Editor:</b>	J.Lalnangliana	9862399658
<b>Joint Editor :</b>	Lalchhandama	9862358347
<b>News Editor :</b>	Thangkhuma	9862303135
	R. Lalrinnggheta	9862358337
	Jacob Lalrinsanga	9612319779
<b>Cir.Manager :</b>	Johny Lalthanpuia	9612359161
	EVL. Hruaitluanga	9862655426
<b>Production Manager :</b>	R.Lalmachhuana	9436151817

**Branch Office Bearer**

<b>President</b>	T. Ngurkhuma	9436190843
<b>Vice President</b>	R. Lalmachhuana	9436151817
<b>Secretary</b>	RL. Thanhnuana	9436152760
<b>Asst. Secretary</b>	Zairemmawia	9862385654
<b>Treasurer</b>	C. Lalzarliana	9436142049
<b>Fin.Secretary</b>	K. Darthantluanga	9436196071
<b>Adviser-te :</b>	<i>Pu Lalbiakthanga Khiangte</i>	
	<i>Pu Rothuama, Pi Zamanthangi</i>	
	<i>Pu Lalrengpuia Sailo</i>	

**Editorial :**

Kar hmasaa YMA member tam zual sawm kan chhuah atang khan ngaih-tuahna thar a awm thei awm e. Mizoram pumah kan branch chu member tam zual sawm zingah kan lang phak lo va, veng lian len mihring tam nia inchhal si zingah chuan thil mak pawl tak a ni awm e.

Veng dang branch-te hian eng angin nge member an inlak a, keini aia vengte zawk nia lang si hi kan phak lo em em a, member lak danah hian kan inen nawn a tha awm e. Tun hma deuh khan inchhiar kan ching thin a, thil reng rengah khan percentage a lak a nih thin avang khan member lakah kan lo fir deuh pawh a ni thei e, chu chuan tun thleng hian min nghawng pawh a ni thei baw.

Member tam nih hrim hrim hi a hlu a ni hran lo va, chutihlaiin, lian ve hle nia kan inngaih lai leh Central YMA lam pawhin min ngai pawimawh ve viau tura kan lo inngaih lai leh CEC *palian* kan tih ang pawh nei ve ziah tura kan lo inngaih lai hian keini aia lian ngaih pawimawh zawk tur an lo tam hle a ni. Engpawh chu lo nise, tam leh tlem lam ngawt ai chuan kan tihtur pual tha leh hlawhtling taka kan hlenchhuah hi a tha ber zawk awm e, chu chu kan dinchhan a ni zawk si a.

**Article : HLA HMANGA THU LEH HLA TIHHMASAWN**

- Zova Tochwawng

Thu leh hla huang kan tih hian kan pi pute'n kaa an lo inhrilh chhawn thin thawnthu te, thawnthu phuachawp (novel & fiction) te, lemchan thawnthu te, hla chhammi (poetry) te leh a saka sak chi hla te a huam tel vek. Chung zingah chuan hla hian rilru hneh theihna leh thiltitheihna a nei sang ber ti ila, kan daw kher awm lo ve. Chutiang a nih avang chuan hlain Thu leh Hla huanga a hmun luah hi a sang hle a ni.

Thu leh hla huanga thil chi hrang hrang kan sawi takte kha ziaka dah te, documentary film leh movie-a siam te an niin an hlu em em vek a. Hla erawh hi chu thua dah rem lo leh sei taka ziah duah ngaite pawh tawi kim taka beng muka duan chhuah a nih bakah zai thiamte'n mawi taka an sak avanga rilru hneh theihna thlarau nei hranpa bik a ni a. Chuvangin, thu leh hla chi hrang hrang puan chhuah nan a tangkai ber pawh kan ti thei hial awm e. Thu leh hla huanga hla pawimawhzia kan chian leh zual nan entirna hla thenkhat i lo thur chhuak den den teh ang.

Kan hla kungpui tam takte zinga Poet of The Century nihna hial an hlan Rokunga'n Mizoram mawizia hlaa a puan chhuahna hi i lo en mah teh ang.

*"Kan Zo tlangram nuam hi chhawrpial run i iang e,*

*Hal lo te'n lungruala dar ang kan lenna, Perhkhuang tingtang zaia kan chawi lai i mawi e,*

*Par mawi tinreng leh thlifim lenna kan Zoram nuam,"*

Thu tluang pangngaia ziah remchang teh teuh lo, hetiang hlaa au chhuahpui a nih hian Zoram mawina a pho lang chiangin hnunhnang a ngah leh zual a. La hmu ngai lote tan pawh hmu a chakawm hliah hliahin lung a tileng vawng vawng thei hial a ni ti ila uar lua kan ni awm lo ve.

Mihringte nuna hmangaihna ropuzia leh pawimawhzia thu pawh Vankhama'n hetiang hian hlaah a lo par chhuahtir a.

*"Thuhriltu'n hmana hmangaih thu a hril khan,*

*Hmangaihna bak ropui leichhinah awm lo, In hmangaih theuh r'u ka lenrua duhte u, Hmangaihin itsik uan thuan reng a rel lo."*

Kan Pathian leh khabuah, "Hmangaih-nain a itsik lo va, hmangaihna a infak lo va, a uang lo va,..." tih kan lo hmu ai khan a mawi a, rilru a hneh fe zawk baw a ni.

Pathianin hmeichhia leh mpate inkara awm tura a duan hmangaihna vanga lunglenna thu au chhuahpui nan pawh hla tluka mawi leh tha hi a awm thei awm lo ve.

*"Thuva indi lamtluang mawitu Phengpheleng leh vahkhua i par tlan, Siahthing zar bel zai tin rem thiam Uleuh, dawrem, thlang kawmu nen Di ngaih lunglen zai kan lo sa,"* tia Lalmingthanga'n a lunglen thu a au

chhuahpuina hla pawh hi a thu a mawin a ril a, a thluk nen a inthlawp that baw avangin thua zia chhuah ngawt ai chuan mi a hnehin ngaih nei ve lote tan pawh kurpui tham a tling a. Hringnun a lailang chiang hle a ni.

Chunnemi tih hla Rokunga phuach pawh hi Mizote in chhunga nu ber dinhmun leh nihphung fiah taka lailangtu a ni chiang kher mai. Heti hian a chham chhuak a.

*"Chhung tin tan paw i ber mai chu chun lunglian*

*Keipui ziatial chhai lai iang a lo hrang e, A ang sen huam mai thin e run chhungah, Run in chhung beram note an tlan del del,"*

He hlaah hian nu ber an cheh, lung liante khawsa zia leh chhungkuain a tawrh theih dan fiahfai takin kan hmu thei a. Chang dangah, nu ber chu chhungkuaa remna siamtu, chhungkhat lainate thatnaa hip bettu an nihzia te, a thatna par chu mi tinin an tlan thu leh chhungkaw tan ro hlu an nihzia chiang takin a tarlang baw a. Inkawm khawm tel tel ching Mizote nuna nu ber pawimawhna a lai lang chiang hle a ni.

Khawhar hla kan tih maite zingah pawh Mizote nunphung leh ngaih dan phawk chhuak thei hla a awm ther fer fur mai. Hla pakhat pawhin,

*"Ka au zel dawn, rihtlang mual a liam hnu I tel lo chuan awihlai ringte lunglai ka hnem zo lo, Lo kir leh la chunnu lungmawl Rihsang mual liam kan la tiam lo ve,"*

tiin pa ber tan nu thihsan naute enkawl buaithlakzia leh a luhaithlakzia chiang takin a tarlang a. Chu bakah kan pi pute ngaih dana mitthi thlarauvin rih dil an pan thin thute pawh kan hmu thei baw. Mizote nunphung leh ngaih dan tarlanna hla tha tak a ni a, kan thu leh hla huang a tihausa zual hle a ni.

**2012 Thuvawn**

*I awmdan tur chu LALPA chungah ngat la; Amah chu ring la, aman a ti vek ang.*

**VANAPA**

Section hruaitu leh member engemawzat chu Gospel Camping lamah an buai hle.

An hruaitu Tv Zohmingliana nu Pi Lalzami chu Durtlang damdawi in lamah a awm mek, dam taka a lo chhuah ngei an duhsak.

Ramhlun venga leimin tuarte tanpuina tur an khawn zo tawh a, Rs 17000 chuang an hmu thei a, tanpuina petute chungah lawmthu an sawi.

**TAITESENA**

Ni 23.9.2012 (Sunday) ral hmian vehbur kan khawnkhawmte secretary hnenah thelut vek turin an inhriattir.

Kan Branch Volleyball team tan Rs. 1,000/- an hlan.

An member Pu Ngurtluanga leh Tv. David Zohmingthanga dam lo pawh an dam thuai an duhsak hle.

An hruaitu NI. P.C. Lalrindiki Shillong lama zin pawh dam takin a lo haw leh ta.

**NEUVA**

Ni 19. September. 2012 zing khan Thlanmual hlui hmun thenkhat sam faia hnatlang neih a ni a, he hnatlang ah hian Pu Chawngzamlova leh Pu John Lalfakzuala ten thingpui tui tak an lum a, an lawm hle.

Ni 17. September 2012 zan inkhawmban khan section Committee Meeting neih a ni.

Section huamchhung ah ngawrh taka duty zel tum a ni.

Ramhlun veng leimin tanpuinan Central YMA in vehbur (pawisa) khawn tura Branch YMA min rawn ngen angin Section huamchhung ah khawn mek a ni a. Chhung tinten tlawngaih chhuaha lo pe theuh turin an inngen.

Dt. 27. September. 2012 khian an Committee member Tv Ricky Lallawmkima'n kawppui tha tak a nei tur chu an phur tlangin an nghakhlel tawh hle a, Section hruaitute an sawmangin tawiam theuh turin an inngen.

**PEM LUT**

Pu PC Pakungate chungkua chu Tuithiang Veng atangin Pu Thangseia 'V' Section-te In ah.

**PEM CHHUAK**

Pu Kapmawiate chungkua chu Pu VL Chhunga 'T' Section-te In atangin Venghlui-ah an pem.

**KHUANGCHERA**

Ni 18.9.2012 (Thawhleh) zan khan Leader Pu Lalchhanhima te inah Meeting an nei a, thu pawimawh tak tak an rel.

Ni 19.9.2012 khan Bungraw enfel hnatlang hruaitute an nei a. Hnatlang chhuakte chawhlui buatsaih saktu an Leader chungah an lawm hle.

YMARUN cheithat tuma hmalak mek a ni a, an sum neihte a beitham deuh avangin Sum leh pai tanpuina pe duh an awm chuan an lawm hle ang.

Bungraw hawh tur leh dah tur ten zing karah chauh hawha dah thin tur a ni tih an inhriatnawntir leh a, ngai pawimawh hram turin an inngen nghal bawk.

An member Pathian Chhandamna chang tharte an lawmpuiin an duhsakna an hlan.

Ni 22.9.2012 khan DDK Aizawl a lengkhawm zai aan thun chu chu a chhuak a, ropui an ti hle.

**CHAWNGBAWLA**

Pathianni tlai khan Leader inah an meeting..

Ramhlun vengthar leh Complex tan vehbur khawn mek a ni a, vawiintlai hian khawn ang ange thelul tur a ni.

October thla tirah hian Section sum tuak nan sangha zawrh tum a ni a, chhungtin ten lo leisak turin an ngen e.

**MHIP**

Ni 19.9.2012 (Nilai) khan Chanmari West Br MHIP leh Care World Vision India te tangkawp chuan Grace Home Durtlang leh Science Centre, Berawtlang an tlawh. Pu C Lalramzauva'n (Tetea) Member kalte hnenah kan kal chhante a sawi hnuin MHIP President Pi Lalbiakngheti'n Pathian hnenah a tawngtai, member 125 lai kalin Bus 3 hman a ni. An hlimin a hlawk thlak hle a ni. Grace Home a dam lo HIV avang a natna tuar mekte tan member ten neih ang ang sum leh paite pek a ni a, eitur tui hnai tak an buatsaih sak bawk a ni. Hemi atana hma lak saktu Pu C Lalramzauva (Tetea) chungah Chanmari West Br MHIP te chuan lawmthu a sawi tak meuh meuh a ni.

Handloom Training Centre leh Tailoring Kendra Training Centre te chu Ni 27-28 Sept 2012 hian exam an nei dawn a. Batch thar leh atan Training leh turte Chanmari West BPL Hruaitute hnenah dilna hun hawn mek a ni.

Kan sawi takte bakah khan hringnun laihlanna hla thahnem tak kan la nei a. Chung zinga thenkhat chu,

'Leng zel ang, leng rei ta sa sa, Leng zel ang aw, leng tar law law ang,' tih te, 'Lo lungphang suh ka nau Vala, ka leng tar awm chuang lo,' tih te, 'Thaibawih kan awm tawh nem maw, chhungkaw tangrual kan ni zawk,' tih te, 'I batnate'n zu man min thing, Engtin nge maw kan tih tak ang le? tihte, 'Zuapan chawltui ningzu a rui thin e, Thai leh hrai duh leng zawngte, Chhingmit kan meng ngam lo lenrual hmaah,' tih te a ni nawk hlawn.

Khang kan sawi tak hlate leh kan sawi lan ve loh mihring nunphung laihlanna te, hmangaihna thu inhlanna tawngkam duah no mawi tak tak te, khawvel min chhuahsan tate kan ngaihzia phuahna hla tam zawkte hi thu tluang pangngaia ziah chhuah kan ngam loh leh remchang lem lo, mite chhiar peih loh leh an rilrua riak lem lo turte an ni vek a. Hlaa phuah chhuah a nih erawh hi chuan kan sak duh ber ber leh kan rilru hneh ber berah an tang a. Kan thu leh hla huangin a hauhsak phahin ro hlu a tling tak zet tih chu kan hre vek awm e.

Heng kan hla neih sate bakah hian thu pangngai tho pawh kil hran atanga thlira phuah chhuah te, a thawnthu huang, a plot phuah thara hla duan chhuah te, hla thu tawngkam mawi leh tharlam phuah chhuah zel te hi kan thu leh hla huang tihhauhsak dan kawng tha tak a ni. Entir nan, tun hma atanga kan lo hman lar, 'ar ang ka vai' tih te pawh hi 'ar khual iangin ka vai' tih emaw, 'Khualleng ar ang ka vai' tih emaw te hman ni ta se, mi tam tak rilru leh mitthlaah a lang Chiang thei zawkin a rinawm. Kan rama hlemhletna, inrawk leh insuamnate hluar takzia leh ngampat takzia sawi nan pawh, 'Hlemhlet, inrawk, insuamnaten tual an leng,' tih mai ai chuan 'Hlemhlet, inrawk, insuamnaten tual an chai,' han tih hian sualna ngampat takzia leh an zalen takzia a tilang Chiang thei zawk bawk awm e. Hetiang tawngkam pangngai bakah hian Sapin simile an tih tehkinna tawngkam, 'puan ang', 'senhri par iang' tih ang chite leh metaphor an tih intlukpui anga channa leh chawina, senhri par anga nula channa 'Senhripari' tih te, arsi anga lsua channa 'Van arsi eng mawi' tih ang chite pawh hi chher thar zel ni sela, kan thu leh hla tihhauhsakna leh hmasawna a ni zel dawn a ni.

Kan sawi takte atang khan hlain kan thu leh hla huang a tihhauhsakzia chu hai rual a awm lo ve. Hla thu sawi chhuah dan tharlam hman leh a thawnthu huang (a plot) valh thara thu leh hla huang tih hmasawn zel hi a pawimawhin kan mamawh tak zet. Chu mawhpurhna chu thangthar zawkte kovah a inngat tlat tih hriain kan thu leh hla huang hmasawn zel nan tan i la thar sauh sauh teh ang u.

**Central YMA**

✂ Ni 25.9.2012-4.10.2012 chhung hian Central YMA leh MVA buatsaihin D-3 Inter Branch YMA Volleyball Tournament 2012 chu High School Field, Zarkawtah neih a ni dawn a, he Tournament-ah hian Mipa Team 47 leh Hmeichhia Team 23 an chhuak.

✂ Ni 19.9.2012 khan Sub-Hqrs. YMA, Serchhip buatsaihin Serchhip Hmar Veng Branch YMA Hall-ah Kumpulan Seminar neih a ni a, hetah hian Central YMA atangin Pu J.H. Zoremthanga, CEC leh Pu C. Vanlalsanga CEC tean an hmanpui a, Pu J.H. Zoremthanga CEC in Paper a present.

✂ Ni 18.9.2012 khan YMA General Conference thlengtu tur Kawrtethawveng Joint YMA te Reception leh Ushering chungchanga Training pein Pu J. Lalsailova, Fin. Secretary chu Kawrtethawveng a kal.

✂ Ni 19-20.9.2012 khan YMA General Conference thengtu tur Kawrtethawveng Joint YMA te inbuatsaihna a hmuna enpuiin Detailed Programme Committee Member-te Kawrtethawveng an kal.

✂ Ramhlun Vengthar leh Ramhlun Sports Complex-a leikhi avanga hnatlangte thingpui inna Rs. 1000/- leh Tetea Zotlang leh Ruthi, Ramhlun North bo zawngte thingpui in nan Rs. 1000/- pek a ni a, Central Jail tlawh nia PWC te hnena Rs. 5000/- pek a ni bawk.

✂ Ramhlun Sports Complex leh Ramhlun Vengthar huamchhunga leikhi avanga harsatna tawkte tanpuina Aizawl khawpui chhunga Branch tinah VEHBUR sum faiin khawn nise, Sept ral hma ngeiin CYMA Office-ah thehluh nise tih a ni.

✂ 67th YMA General Conference Kawrtethawvenga neih turah Mary Kom, Olympic Medallist chu Central YMA hminga chawimawina hlan nise tih a ni.

✂ CEC Meeting hian Langkaih Group YMA atanga YMA Life Member nih dil mi 4 te chu lawm takin a pawmpui.

**Thlanmual Sub-Committee**

✂ Kar leh hun remchangah Kuang duan hnatlang neih tur ani a, Memberte hun awl lo in siam lawk turin an inngen.

✂ An Chairman Pu Thanseia pawh Camping buatsaih mekah a buai thei hle. Member Camping lutte thlarau lamah hlawkna an chan ngei an beisei.

**ZOFA**

✂ Ni 21.9.2012 (Zirtawpni) khan member 16 te chuan Reiek-a Anthurium Festival-ah Bualpui Cheraw an entir. Member thawkchhuakte chungah lawmthu an sawi.

✂ Ral Lu Lam Documentary Film siam turin hma an la mek a, Ni 29.9.2012 (Inrinni) hian Shooting hmasa ber chu **PKT Farm** (Seling) ah an nei dawn a, member 15 vel an thawkchhuak ang.

**CWYMA VOLLEYBALL REPORT**

✂ Vawiin tlai Dar 3:00-ah hian Pu C. lalmuankima inah Volleyball playerte kim taka kal khawm vek tur a ni e.

✂ Ni 27.9.2012 hian High School Field-ah kan Branch YMA ten Electric Veng leh Govt. Complex chak zawk zawk an khel dawn a, veng mipui tam thei ang ber en tura ngen inni e.

**Gospel Camping**

Dt 18th - 22nd September, 2012 khan Chhandamna camping chhawng thumna Chanmari West Presbyterian Kohhran bultum in Chanmari West Presbyterian Kohhran Biakinah neih a ni a, he camping-ah hian vengchhung mi Mipa - 174, Hmeichhia - 168, Total - 342 an lut a, Salvation Army - 10, UPC - 4, Baptist - 3, Roman Catholic - 3 leh Adventist - 1 leh a bak zawng chu Presbyterian Kohhran an ni. Veng dang atang pawhin mi 24 lai an lut bawk. Campers zinga upa ber hi kum 77 niin naupangber hi kum 12 a ni. He camping-ah hian rawngbawltu 40 awmin Tual Upa Lalhunpuia chu Speaker a ni.

**Kum 1990-a kan branch****YMA hruaitute :**

President : Lianchhuna  
Vice President : T. Bualzika  
Secretary : Lalramzauva  
Asst. Secretary : R. Lalchhuanawma  
Treasurer : Vanlalsawma  
Fin. Secretary : Ramtharngaka

Executive Members :  
Zoramtana C. Sangkhuma  
Vanlalthuma T. Ngurkhuma  
C. Lawihmingthanga C. Lalthazuala  
S. Lalsangliana H. Lalremruata  
R. Lalmalsawma H. Biakchhunga  
C. Vanlalthnema V. Lianzinga  
Saihnuna Sailo R. Rokima  
Z. Lawmsanga Lalsikula  
G. Lalduhawma Lalthuamluaia  
C. Vanlalsawma H. Laltanpuia  
Ngurtluanga K. Rosiama  
P.C. Pakunga R.L. Thanhnuna  
Senior Advisers : C. Thansiam  
Lalkunga Hmingthanzuala

**SMS**

**SMS thawna tur : 9862358337.**

✂ Vanapa section huam chhunga ui vulhute kha in ui vulhte tha taka enkawl tura beisei in ni e. In ui vulhte hram ri kha mi dangte tan bengchheng a tling asin.

9774587954

✂ Vanapa section-a Steel Almirah siamna ri vak vak zel hi kan va han ning tawh tak em!!!!

7308379877

*SMS kan dawnte hi Editorial Board ngaihdan a ni vek kher lo.*

**HRIATTIRNA LEH NGENNA**

Kan hriat theuh angin YMA te'n veng chhungah 'Faina Hnatlang' kan lo nei fo thin a. Kum tin October thla hian "Faina Hapta" Zoram pumah hman a ni thin a. He hun leh ni lo thleng tur denchhen hian October ni 2 (Thawhlehi) hian section huam chhungah 'Faina Hnatlang' neih tum a ni a. YMA tihturah dah mai lovin YMA te hnatlan hma ngei hian; chhungtinte'n mahni in leh a vel, **kawt ko, lungrem step, in bula thil tangkai lo kan dah rengte, mi dang tana hnawksak leh hmuh nuam lo ang chi reng rengte** lo tifai a, lo indah fel vek turin chhungtinte kan ngen a ni. Kan tanrualna hian veng fai leh veng nuam a siam dawn a ni.

**Secretary  
Khaungchera Section,  
CWBYMA**

IN SA MEK TAN  
THU LAWMAWM!!

HLUNBUANG STORE chuan Electric parts chi hrang hrang discount sang takin a pe thei ta e. Tin, inchhung electric wiring pawh mi dang rate aia tlawmin kan tihsak thei bawk e. Min rawn pan ve teh. Engtik lai pawha koh theih reng kan ni a, koh man a awm lo.

Hlunbuang Store  
(Gov't register contractor)

New market : Aizawl  
Ph: 9862856070, 9862536581,

**KEIMAHNI**

✂ Veng chhung mi hmun danga awm ten an lo chhiar theih nan YMA AW hi kartin Internet-ah update thin a ni a, Internet atanga chhiar duh tan <http://www.ymaaw.weebly.com> ah chhiar theihin a awm. Tin, pdf file format a download theiha dah a ni bawk.